

Dla fatiga ai na va poca  
 Pr guari sti bei umor;  
 Van cogià ampò ant la fioca  
 Fin ch' ai passa coul calor.  
 Van cogià, ecc.

Sebastiano Bodino.

CANZONE XL.

Bastian Bodin,  
 Cugnà d' Martin,  
 Ch' a va tirand seira e matin  
 D' fusète dant le maje, *o bien*,  
 Ch' ai fan cuncè le braje,  
*Vous m'entenderez bien.*

A l' ha acquistà  
 La nobiltà  
 Ant l' ospidal dla carità,  
 Guardè che bel garofo, *o bien*,  
 Da tnilo sot un cofo.  
*Vous, etc.*

L' è stait trovà  
 Na matinà  
 Dnans a la porta del Curà  
 Ficà ant una cavagna, *o bien*,  
 Ambèrlifà ant la bagna.  
*Vous, etc.*

Brut com' la neuit,  
 E senza deuit,  
 A smia giust un babi cheuit,  
 E senza di busie, *o bien*,  
 L' ha un moro da fè rie.  
*Vous, etc.*

A l'è un massoch,  
 A l'è un taroch  
 Surti d'an mes a j' articioch,  
 A val pa nen la caria, *o bien*,  
 Da felo sauté an aria,  
*Vous, etc.*

Che poltronas!  
 Che patoflas!  
 Buchelo mach ant 'l mostas;  
 L'ha la fisonomia, *o bien*,  
 Dl'istessa gargaria.  
*Vous, etc.*

O che stransi!  
 O che mufi,  
 Ch'a veul ancora comparì!  
 Con coula soa tignassa, *o bien*,  
 Ch'a smia una ramassa.  
*Vous, etc.*

Lo ch'a l'è 'l pi bel,  
 A l'ha un servel,  
 Ch'a l'è fait sul meder d'un crivel,  
 Da chial a j'è poch svari, *o bien*,  
 A coui là d' San Sudari.  
*Vous, etc.*

Che gran pacioch,  
 E che fabioch,  
 A smia fait al breu dij gnoch!  
 L'è un bel e bon badola, *o bien*,  
 Pr fè virè la mola.  
*Vous, etc.*

Veul fè 'l grassios  
 E l' spiritos,  
 Pensandse d'esse manieras,  
 Ma l'ha d' certe manere, *o bien*,  
 Da sbèrgiairelo a pere.  
*Vous, etc.*

Cristian del doi,  
 L'è un cēca poi,  
 Ch'a s' vada ampò stermè ant i coi,  
 Empiomie 'l cul d' bora, o *bien*,  
 Mandomlo a la malora.  
*Vous, etc.*

An conclusion

A l' ha nen d' bon,  
 Salvand ch'a l' è un gran ciaciaron;  
 A l' ha nen mach d' ganassa, o *bien*,  
 Soa lenga 'l cul a n' pnassa.  
*Vous m'entenderez bien.*

Dialogo d'un Medico e Marion,  
 che pare inferma.

### CANZONE XLI.

Dis un poch, Marion, cos' astu,  
 Ch' i t' ses tant contrafaita?  
 Povrinna! i t' ses mai staita  
 D' un sì cativ color.  
 Oh s' i t' voleisse pietè  
 La curiosità d' specete,  
 Sì sì ch' i t' avrie por!  
 Sburdive pa, sgnor Medich,  
 Mi n' eu pa nen pagura  
 D' andè a là sepoltura  
 Tant dunna e facilment;  
 A l' è pa ancor un' ora  
 Ch' j' eu dait così pr dmora  
 Marlait da molè ai dent.  
 E cosa mai saralo  
 Ch' i t' as mangià d' contrari?  
 A l' è pa to ordinari